

## UMARAN JAUNARI BERE EGUNEAN.

Ez da munduan ezagutuzten  
 Ezer tinka dagoenik.  
 Eguraldi on eta lasaiak  
 Dakar ekaitza ondotik:  
 Gizatasunen bizia ez da  
 Burnizko kate bat baizik,  
 Non aurkituzten diran jayera  
 On ta char denak zinzillik.  
 Argirik ez da beti diraunik  
 Desberdintasunik gabe:  
 Urte guzian zimur gabeko  
 Lorerik, ez eta ere:  
 Illunaldiak izaten ditu  
 Eguzkiak berak ere,  
 Izanagatik mundu askori  
 Argi egiteko trebe.  
 Baña, zuk dezun amorioa  
 Ama maiterenganako  
 Ordu gaiztoan ken zizkiguten  
 Lege zarrakenganako:  
 Lurra jorikan arkituzten dan  
 Jaioterrienganako;  
 Jaunak, dirudi, sartu zizula  
 Biotzean sekulako.  
 ¿Nola ez dira, oraindik ere,  
 Enzungo belar chuluan,  
 ¿Nola ez dute soñu egingo  
 Umaran, nere buruan,  
 Donostiako bazkarichoan  
 Bildu giñaden orduan,  
 Adi nizkitzun itz eder aek  
 Pozez ia zoratuan?

Kabi beroan chori gaiñoa  
 Dan bezela esnatuzten,  
 Egunsentiko aizeren otsa  
 Duenean sentituzten;  
 Zure aotik išurtzen ziran  
 Itzak ninduten alaitzen;  
 Eta bularrak, Fueroen alde,  
 Irazeki eta arrotzen.  
 Berrogei urtez izandu arren  
 Urruti Euskal-erritik:  
 Arkitu arren zure burua  
 Elur utsez zuriturik,  
 Eta bizkarra, lanaren bidez,  
 Zerbait ere makurturik,  
 Pozkidatzen naiz dezula biotz  
 Altzairuzkoa oraindik....  
 Zu bezelako semeak ditu  
 Bear Aitorren erriak;  
 Itzak pisu ta begiak zorrotz,  
 Alcharikan bekokiak,  
 Biotz indartsu autsiezkorrak  
 Ditutzen ume argiak;  
 Ez patu charrak negar erazten  
 Dizkien aur bildurriak.  
 Oroiturikan, kristandadean  
 Gaur dala zure eguna,  
 Jaungoikoari diot eskatzen,  
 Zuretzat, Umaran jauna,  
 Bizitz ontako basamortuan  
 Urte askoz osasuna;  
 Eta ondoren, zeruetara  
 Egaatzeko zoriona.

KLAUDIO OTAEGI-KOAK.